

Julie Morgan AS/MS
Y Dirprwy Weinidog Gwasanaethau Cymdeithasol
Deputy Minister for Social Services



Llywodraeth Cymru
Welsh Government

Russell George AS
Cadeirydd,
Y Pwyllgor Iechyd a Gofal Cymdeithasol
Senedd Cymru
Bae Caerdydd
Caerdydd
CF99 1SN

29 Gorffennaf 2023

Annwyl Russell,

Ysgrifennodd y Gweinidog Iechyd a Gwasanaethau Cymdeithasol, y Dirprwy Weinidog Iechyd Meddwl a Llesiant, a finnau atoch ar 7 Mawrth mewn ymateb i adroddiad y Pwyllgor Iechyd a Gofal Cymdeithasol, *Cyllideb ddrafft Llywodraeth Cymru 2023-24*.

O dan Argymhelliad 9, argymhellodd y Pwyllgor y dylai Llywodraeth Cymru ymrwmo i ddarparu diweddariadau bob chwe mis ar y canlynol:

- (1) gwaith y Fforwm Gwaith Teg Gofal Cymdeithasol;
- (2) y camau a gymerir i fwrw ymlaen â'r argymhellion a wnaed gan y Grŵp Arbenigol ar ddatblygu gwasanaeth gofal cenedlaethol i Gymru.

Yn unol ag argymhelliad y Pwyllgor, fe wnaethom ymrwmo i ddarparu'r diweddariadau ysgrifenedig cyntaf erbyn diwedd mis Mehefin 2023.

Rwy'n ysgrifennu atoch heddiw i roi diweddariad ichi ar y meysydd hyn (gweler Atodiad A). Rwy'n gobeithio bod y diweddariad hwn o gymorth ichi. Rhowch wybod os oes gan y Pwyllgor unrhyw gwestiynau pellach. Byddaf yn ysgrifennu atoch eto ym mis Rhagfyr 2023 gan atodi'r diweddariad chwe mis nesaf ar y meysydd dan sylw.

Yn gywir

Julie Morgan AS/MS
Y Dirprwy Weinidog Gwasanaethau Cymdeithasol
Deputy Minister for Social Services

Canolfan Cyswllt Cyntaf / First Point of Contact Centre:
0300 0604400

Bae Caerdydd • Cardiff Bay
Caerdydd • Cardiff
CF99 1SN

Gohebiaeth.Julie.Morgan@llyw.cymru
Correspondence.Julie.Morgan@gov.wales

Rydym yn croesawu derbyn gohebiaeth yn Gymraeg. Byddwn yn ateb gohebiaeth a dderbynnir yn Gymraeg yn Gymraeg ac ni fydd gohebu yn Gymraeg yn arwain at oedi.

We welcome receiving correspondence in Welsh. Any correspondence received in Welsh will be answered in Welsh and corresponding in Welsh will not lead to a delay in responding.

Atodiad A

Diweddariad ysgrifenedig ar feysydd Argymhelliad 9 yn adroddiad y Pwyllgor Iechyd a Gofal Cymdeithasol 'Cylideb ddrafft Llywodraeth Cymru 2023-24'

1. Diweddariad ar waith y Fforwm Gwaith Teg Gofal Cymdeithasol

Cefndir

Cafodd y Fforwm Gwaith Teg Gofal Cymdeithasol ei sefydlu ym mis Medi 2020, gan dynnu ynghyd y Llywodraeth, cyflogwyr ac undebau i gydweithio mewn partneriaeth gymdeithasol i ystyried sut y dylid cymhwyso'r diffiniad o waith teg ar gyfer gweithwyr gofal cymdeithasol yng Nghymru. Drwy gydol 2022, a thrwy gynnal trafodaethau cyd-bartneriaeth, parhaodd y Fforwm â'i waith o ddisgrifio arferion gwaith da a gwaith teg mewn gofal cymdeithasol.

Cynnydd yn erbyn blaenoriaethau gwaith teg

Gwobrwyo teg, cydnabyddiaeth, a chyfleoedd i gamu ymlaen yn eich gyrfa i bobl sy'n gweithio yn y sector Gofal Cymdeithasol.

Yn ogystal â'n hymrwymiad yn y rhaglen lywodraethu i dalu'r cyflog byw gwirioneddol i weithwyr gofal cymdeithasol yng Nghymru, mae'r Fforwm Gwaith Teg Gofal Cymdeithasol wedi bod yn gweithio mewn partneriaeth i ystyried sut y gellid gwella amodau gweithio gweithwyr gofal cymdeithasol yng Nghymru. Mae hynny'n cynnwys datblygu Fframwaith Tâl a Dilyniant drafft ar gyfer y sector gofal cymdeithasol. Gan ganolbwyntio ar rolau gofal uniongyrchol yn y lle cyntaf, nod y fframwaith drafft yw darparu tâl cyson, a mwy o gyfleoedd i ddatblygu a chamu ymlaen mewn gyrfaoedd drwy bennu bandiau eang ar gyfer rolau mewn gofal cymdeithasol, sy'n cyd-fynd â sgiliau, cyfleoedd dysgu, a lefelau cyflog. Mae ymgynghoriad yn cael ei gynnal ar hyn o bryd fel rhan o'r rhaglen ailgydbwyso gofal a chymorth. Mae'r Fforwm o'r farn bod darparu llwybr dilyniant mewn gyrfaoedd yn y sector yn elfen hanfodol o waith teg.

Cydraddoldeb o ran telerau ac amodau drwy gydfargeinio.

Mae Grŵp Gorchwyl a Gorffen y Fforwm wedi bod yn ystyried sut y gellid datblygu model unigryw ar gyfer cydfargeinio ar gyfer y sector gofal cymdeithasol annibynnol yng Nghymru. Yn y pen draw, byddai'r model hwn yn ymgorffori llawer o elfennau Gwaith Teg y mae'r Fforwm yn gweithio arnynt ar hyn o bryd. Erbyn yr hydref, bydd y Fforwm Gwaith Teg Gofal Cymdeithasol yn cytuno ar ei weledigaeth a'i egwyddorion eang ar gyfer cydfargeinio, a bydd yn darparu memorandwm cyd-ddealltwriaeth ar gyfer aelodaeth wirfoddol. Oherwydd y cymhlethdodau, bydd dull gweithredu fesul cam yn cael ei ddefnyddio i weithredu hyn, gyda threfniadau partneriaeth cydfargeinio gwirfoddol ar gyfer gofal cymdeithasol yng Nghymru yn cael eu treialu, eu gwerthuso a'u datblygu ymhellach yn ystod 2023-24.

Mae diweddariad pellach ar hynt gwaith y Fforwm a'i flaenoriaethau ar gyfer 2023-24 ar gael yma: Fforwm Gwaith Teg Gofal Cymdeithasol: adroddiad cynnydd blynyddol 2023

2. Camau a gymerir i fwrw ymlaen â'r argymhellion a wnaed gan y Grŵp Arbenigol ar ddatblygu gwasanaeth gofal cenedlaethol i Gymru.

Cefndir

Cafodd y Grŵp Arbenigol ei sefydlu ym mis Chwefror 2022 i roi cyngor ar yr uchelgais a rennir ar gyfer datblygu Gwasanaeth Gofal Cenedlaethol, yn unol â'r ymrwymiad yn y Cytundeb Cydweithio â Phlaid Cymru. Yn sgil hynny, paratôdd y Grŵp adroddiad manwl sy'n cynnwys cyfres o argymhellion ynglŷn â sut y gellid mynd ati i ddatblygu gwasanaeth gofal cenedlaethol.

Diweddariad

Mae'r rhaglen Ailgydbwyso Gofal a Chymorth bresennol yn ategu llawer o gasgliadau'r Grŵp Arbenigol, a chafwyd diweddariad ar y gwaith hwn drwy Ddatganiad Llafar 20 Mehefin ar fesurau cenedlaethol i gryfhau gofal cymdeithasol. Yn benodol, bydd y cynigion ynghylch y Fframwaith Cenedlaethol ar gyfer Comisiynu Gofal a Chymorth yng Nghymru, a'r cynigion ar gyfer y Swyddfa Gofal Cymdeithasol Cenedlaethol, yn rhan o'r blociau adeiladu cyntaf yn y gwaith o sefydlu Gwasanaeth Gofal Cenedlaethol. Lanswyd yr ymgynghoriad ffurfiol ar y rhaglen Ailgydbwyso Gofal a Chymorth ar 22 Mai, ac mae'n cynnwys Fframwaith Cod Ymarfer Cenedlaethol drafft, cynigion sy'n ymwneud â swyddogaeth y Swyddfa Genedlaethol, yn ogystal â'r cynigion ar gyfer y Fframwaith Tâl a Dilyniant drafft a ddisgrifir uchod. Daw'r ymgynghoriad i ben ar 14 Awst, a bydd swyddogion wedyn yn ystyried yr adborth yn ofalus cyn llunio fersiwn derfynol y cynigion.

Ochr yn ochr â'r rhaglen Ailgydbwyso Gofal a Chymorth, rydym hefyd yn datblygu Cynllun Gweithredu Cychwynnol penodol ar gyfer y Gwasanaeth Gofal a Chymorth Cenedlaethol (nodwch fod yr enw hwn wedi cael ei argymhell gan y Grŵp Arbenigol). Bydd hyn y cynnwys y cynigion presennol yn y rhaglen Ailgydbwyso Gofal a Chymorth, yn ogystal â meysydd ychwanegol yn unol ag argymhellion y Grŵp Arbenigol. Rydym yn bwriadu gwneud cyhoeddiad pellach ar y Cynllun Gweithredu Cychwynnol yn y dyfodol agos.